

1 PETER

Tahi Lede a Peter

Di haga modongoohia:

Tahi lede a Peter la nehihi anggi nia dama a Christ, ala ehagaingoo bolo *nia daangada ni God nehilihili* (1.1) ala enoho bahiingeia i Asia Dulii. Tahi mee hagalahagau odi lede deenei, le ehagamaalooaga nia dama a Christ ala guu noho ilodo nia haingadaa o nia dadaaligi ge hagaduadua inadau hagadonu. Peter nehihi di maa belee hagalahahia anggi nia dama a Christ di hai odi Longo Humalia o Jesus Christ, dela ne made, mouli aga, ga hagababa bolo e hanimoi, ewanga gi digaula di hagadagadagee. Mai i di mee deenei, digaula gu hagakono ilodo nadau hagaduadua, guu hai di haga modongoohia o di tonu o nadau hagadonu, gei ginaadou gaa kae di hui o di hagadonu deenei i di laangi Jesus Christ dela e hanimoi ai.

Tangada nehihi di mee deenei, ehagamahimahi labelaa anggi digaula bolo gi momouli be nia daangada ni Christ.

Di hagahonu di beebaa deenei:

Di haga modongoohia (1.1-2)

Hagalahahia di haga mouli mai baahi o God (1.3-12)

Di aago hagamahi di hai o di mouli dabu (1.13—2.10)

Tuhongo hegau dama a Christ i di madagoaa hagaduadua (2.11—4.19)

Di hila gi lala mo di hai hegau dama a Christ (5.1-11)

Di hagaodi gi muli (5.12-14)

¹ Mai Peter, tangada agoago hagau a Jesus Christ, ang gi nia daangada a God ne hilihili, ala enoho be digau mai idaha ihongo nia guongo go Pontus, Galatia, Cappadocia, Asia mo Bithynia. ² Goodou ne hilihili aga mai idi hiihai o God Tamana, gaa hai digau dabu mai i dono Hagataalunga, bolo goodou gi hagalongo ang gi Jesus Christ, ge gi madammaa goodou i ono dodo.

Tumaalia mo di noho i di aumaalia gii dohu humalia i godou baahi.

Di hagadagadagagee mouli

³ Gidaadou gidanggee ang gi God, Tamana o tadau Dagi go Jesus Christ. Idimaa go dono dumaalia aamua, Ia negaamai gi gidaadou di mouli hoou i dana haga mouli aga a Jesus Christ mai idi made. Di mee deenei gu haga honu gidaadou gi di hagadagadagagee mouli. ⁴ Deenei tadau mee ekanakana bolo gidaadou ga hai mee gidi maluagina dela nebenebene go God ang gi ana daangada. Mee ebenebene adu gi goodou nia maluagina aanei idi langi, idi gowaa dela hagalee mooho, be epobo, be engudu gidaha. ⁵ Nia maluagina aanei ala ebenebene go di mogobuna o God laa adu gi goodou mai di hagadonu, anga gidi hagamouli dela gutogomaalia egila aga idi hagaodi odi madagoaa. ⁶ Malaa, goodou gitenetene, eimaha hogi maa goodou elodohuaidu idi madagoaa bodobodo, mai inia hagamada

e logo ala e tale adu gi goodou. ⁷ Tadinga o nia haingadaa aanei le e hagamodongoohia bolo godou hagadonu le edonu. Nia goolo hogi e mee di mooho magamanamana gidi ahi, malaa, e hai gadoo be godou hagadonu, ala koia e hagabalagau i nia goolo, e hailoo gi hagamada bolo gi maaloo ai. Gei goodou ga hai mee gi di tene mo di madamada mo di hagalaamua i di laangi dela e gila mai ai Jesus Christ. ⁸ Goodou e aloho i Mee, gei goodou digi mmada gi Mee. Goodou e hagadonu a Mee, gei goodou e de gidee a Mee dolomeenei. Ga hidi ai goodou ga tenetene huoloo i di tene dela e deemee di hagamodongoohia go nnelekai, ⁹ idimaa, goodou guu kae di haga mouli o godou mouli, deela tadinga o godou hagadonu a Mee. ¹⁰ Mai di haga mouli deenei, dela ne hidi ai nia soukohp namua ga halahala, ga haga dina gi humalia, ga kokohp di hai o di wanga dehuia dela belee gowadu go God gi goodou. ¹¹ Digaula ne hagamada e halahala di madagoaa beheee ge dehee dono dau mai. Deenei di madagoaa di Hagataalunga o Christ dela i nadau lodo, ne hagamodongoohia gi digaula di dau mai nia hagaduadua ala e hagakono go Christ mo di madamada dela e gila mai nomuli.

¹² God gu hagamodongoohia ginia soukohp aalaa bolo nadau hegau la hagalee nia mee belee hagahumalia ai ginaadou, gei nia mee belee hagahumalia ai goodou, i di nadau leelee inia agoago ala edonu, ala e hagalongolongo ginai goodou dolomeenei. Digau hagau o di Longo Humalia, aanei digau ala e hagadele adu gi goodou nia agoago aanei, mai i di mogobuna o di

Hagataalunga Dabu dela ne hagau mai i di langi. Aanei nia agoago e donu ala e hiihai labelaa ginai digau di langi bolo ginaadou e hai gi iloo.

Di gahigahi ang gi di mouli dabu

¹³ Malaa, goodou hagatogomaalia ge gi haga noho ina gi humalia godou hagama-maanadu. Goodou gii noho kanakana, gei gi hagadagadagagee hua ginia maluagina ala ga hai mee ginai goodou idi madagoaa Jesus Christ ma ga gila mai. ¹⁴ Goodou hagalongo ang gi God. Hudee heia godou mouli gi dagi ina go nia hagadilinga hiihai ala nogo i godou baahi idi godou madagoaa nogo de hagalongo. ¹⁵ Goodou gii dabu i godou mee huogodoo ala e hai, gii hai be God dela ne gahigahi mai goodou dela e dabu.

¹⁶ Di Beebaa Dabu e helekai,
“Goodou e hai gii dabu,
idimaa, Au e dabu.”*

¹⁷ Goodou gahia a Mee bolo “Tamana” i godou haidalodalo ang gi God dela ehagiaga nia daangada huogodoo gidi hagiaga edahi, e hagatau anga gi nnegau o tangada ne hai. Malaa, goodou gimmaadagu modi hagabalabagau ina a Mee ilodo godou mouli dela emouli i henuailala. ¹⁸ Idimaa, goodou e iloo hua di mee dela ne haga dagaloaha goodou gidaha modi balu mouli dono hadinga ai, nogo mouliai godou maadua mmaadua. Goodou hagalee ne haga dagaloaha go nia mee moohongoohia, be nia silber be nia goolo, ¹⁹ gei go tigidaumaha huingadaa, go nia dodo hagabalabagau o Christ,

* **1.16:** Leviticus 11.44-45; 19.2

dela go Tamasibi madammaa, ono milimilia ai. ²⁰ Mee nehiliaga ibaahi o God imua di hai o henuailala, ge guhagamodongoohiaaga inia laangi muliagi aanei belee hagahumalia goodou. ²¹ Goodou nehagadonu a God mai i Christ, dela nehagamouliaga go Mee mai idi made, gaa wanga gi Mee nia madamada, malaa, godou hagadonu mo godou hagadagadagee giiluia ang gi God.

²² Mai idi godou daudali di tonu, goodou guhagamammaa goodou, guaalo ho igodou duaahina hagadonu, deelaalaa goodou gi hagadau aalo ho aga ilodo godou manawa hagatau. ²³ Nnelekai a God ala ehagamouli ge e noho hua beelaa, la nehaga haanau goodou labelaa giihai be nia dama ni Tamana dela hagalee made, hagalee nia dama ni tamana dela e made. ²⁴ Idimaa, di Beebaa Dabu e helekai, “Nia daangada huogodoo le ehai be nia geinga tolo, gei nadau madamada le ehai be nia akai lodo geinga.

Nia geinga tolo la gaa mae,
gei nia akai la ga monnono,*

²⁵ gei nnelekai a Dimaadua le e noho hua beelaa, ono hagaodi ai.”

Nnelekai aanei la go di Longo Humalia dela ne hagadele adu gi goodou.

2

Di hadu mouli mo tenuta dabu

* **1.24:** Isaiah 40.6-8

¹ Goodou kilia gidaha nia mee huaidu huogodoo. Goodou kilia gi daha nia kai tilikai, mo nia halahalau dangada, dubua mo nnelekai huaidu. ² Heia goodou gii hai be nia damalligi ala ehiihaihua einu nia weuu donu odi hagataalunga, gitomoaga goodou gi mouli.

³ Idimaa, di Beebaa Dabu e helekai boloo, “Goodou gu gidee tumaalia o Dimaadua.”*

⁴ Malaa, goodou lloomoi gi Tagi, idimaa, go Mee dela go di Hadu mouli, dela ne hudu gi daha go nia daangada be di balumee, ge gu hilihili aga go God guu hai di hadu hagabalagau. ⁵ Goodou lloomoi be nia hadu mouli, ehau di hale daumaha hagataalunga, di gowaa dela e hai godou hegau dabu mo godou tigidaumaha hagataalunga gi God mai i Jesus Christ. ⁶ Idimaa, di Beebaa Dabu e helekai, “Au gu hilihili aga dagu hadu hagabalagau, e dugu e hai di hadu madaaduge i Zion. Tangada ga hagadonu di hadu deenei, geia hagalee lodo huaidu.”*

⁷ Di hadu deenei ehagabalagau huoloo anggi digau ala ehagadonu; gei anggi digau ala dehagadonu:

“Di hadu dela ne haga balumee
gaa hudu gi daha go digau hau hale,
la guu hai di hadu hagabalagau huoloo
i hongo nia mee huogodoo.”*

⁸ Gei nia madagowaa i golo, e helekai,
“Deenei di hadu dela e hai nia daangada
gi tingatinga,
deenei di hadugalaa dela e hai digaula gii too.”

* **2.3:** Pisalem 34.8

* **2.6:** Isaiah 28.16

* **2.7:** Pisalem

Digaula etingatinga, idimaa, digaula digi hagdONU ana helekai, deenei di manawa o God anggi digaula.

⁹ Gei goodou lago di madawaawa ne hilihili, digau hai meedabu nidi king, nia daangada dabuaahia, nia dama donu a God ne hilihili aga belee hagadele nia mee haga goboina ala ne hai gi ono lima, dela negahigahi mai goodou gidaha modi bouli, gaadugu goodou gilodo dono maalama madamada.* ¹⁰ Imua, goodou hagalee nia dama ni God, gei dolomeenei guu hai nia dama ni Mee. Imua, goodou nogo deiloo tumaalia o God, gei dolomeenei, gu hai mee gi dono dumaalia.*

Nia hege a God

¹¹ Ogu ihoo hagaaloho nei, au e hagamahiadu gi goodou be digau mai idaha, bolo goodou gimaaliu mai gidaha mo nia hiihai huaidu o godou huaidina, ala e heebagi anggi godou mouli inia madagoaa huogodoo. ¹² Godou hangahaihai humalia giheia labelaa ibaahi nia daangada ala digi maalama, idimaa, di madagoaa digaula gaa hai nadau kaitilikai bolo goodou digau huaidu, gei digaula gammadaadu gi godou haihai humalia, ga hagaamu a God idi Laangi ma ga hanimoi iei Mee.

¹³ Mai di hiihai o Tagi, goodou gi dugu anga goodou gi digau huogodoo ala nadau mogobuna dagi: Anggi di king aamua, go mee ono mogobuna e dagi muginua, ¹⁴ mo anggi nia gobinaa

* **2.9:** Exodus 19.5-6; Isaiah 43.20,21; Deuteronomy 4.20; 7.6; 14.2;

Titus 2.14; Isaiah 9.2

* **2.10:** Hosea 2.23

ala nedongo go mee belee hagaduadua digau ala ehai nia mee huaidu, ge ehagaamu digau ala ehai nia mee humalia. ¹⁵ Idimaa, deenei di manawa o God bolo goodou gidugua nia leele huaidu o digau ala edadaulia, gi godou haihai humalia. ¹⁶ Goodou gimouli be digau maa-hede, ge hudee haga hai hegau ina godou maa-hede egahu di huaidu, gei gimouli be nia hege a God. ¹⁷ Goodou hagalahagau ina nia daangada huogodoo. Goodou aloho i godou duaahina dama a Christ. Goodou hagalaamua ina a God, gei gi hagalahagau ina di king.

Ada hagaduadua o Christ

¹⁸ Goodou go nia hege, duguanga goodou gi godou gau aamua, gei gi hagamodongoochia ina gi digaula godou hagalahagau digaula huoloo. Malaa, hagalee angahua gi digau ala e humalia ge dumaalia, mo anga labelaa gi digau ala ehagamuamua. ¹⁹ God ga hagamalia laa goodou idigodou manawa hagakono inia hagaduadua edeetau giikae go goodou, idimaa, goodou eiloo bolo goodou ehai di mee dela ehiihai ginai a God. ²⁰ Maa goodou gamanawa hagakono gi godou dadaaligi etau gi godou huaidu, di humalia aha egilaadu gi goodou? Maa goodou gamanawa hagakono gi godou dadaaligi i di gili nia huaidu hagalee ne hai go goodou, God ga hagamalia laa goodou. ²¹ God negahigahi goodou gidi mee deenei, idimaa, ma go Christ dela ne hagaduadua i goodou, ga gowadu gi goodou di hagatau humalia bolo goodou gi daudalia, gi kawae ai. ²² Mee digi hai

dana mee hala, tangada ne longono di kai tilikai mai dono ngudu ai.* ²³ Nia daangada ne leelee huaidu i Mee, gei Mee digi helekai hai baahi. I lodo dono hagaduadua, gei Mee digi hagahuaidu ina digau nogo dadaaligi Ia, gei Mee ne dugu anga hua ono hagadagadagagee huogodoo gi God, Tangada Hai gabunga e donu.* ²⁴ Christ guukae tadau huaidu i ono lodo gidi loobuu, bolo giimmade gidaadou gidi huaidu ge gimouli gidi tonu. Ono gowaa moholehole ne hagahili ai goodou.* ²⁵ Goodou guu hai be nia siibi ne de gidee nadau ala, gei dolomeenei goodou gulaha mai gi muli e daudali di godou Dangada Hagaloohi, Tangada dela e benebene godou mouli.*

3

*Nia ahina mo nia daane hai lodo
(Ephesians 5.22-31; Colossians 3.18-19)*

¹ Idi hai la hua, nia ahina hai lodo, goodou duguanga goodou gi godou lodo. Idimaa, hunu ginaadou hagalee hagadonu nia helekai a God, gei godou mouli humalia gaahai digaula gi hagadonu. Goodou hagalee hailoo bolo gi helekai, ² idimaa, digaula gaabida gidee hua godou mouli madammaa, mo di godou hagalaamua God. ³ Goodou hudee laagei ina goodou gidi hai edala godou libogo, ginia haugoolo, be ginia gahu ala egahu goodou.* ⁴ Gei godou madamada gi heia mai i godou

* 2.22: Isaiah 53.9

* 2.23: Isaiah 53.7

* 2.24: Isaiah 53.5

* 2.25: Isaiah 53.6

* 3.3: 1 Timothy 2.9

lodo donu, di madamada odi hagataalunga balabala mo hila gilala edengudu, dela ekaedahi edahidamee imua nnadumada a God. ⁵ Idimaa, deenei di hai onia ahina dabu namua, ehagadagadagagee gi God. Digaula ehai ginaadou gimadamada, idi nadau dugu ginaadou gi nadau lodo. ⁶ Be di hai a Sarah ne hagalongo gi Abraham, gaagahi a mee bolo dono dagi. Goodou guuhai nia dama ahina ni mee maa goodou gamouli humalia, ga hagalee mmaadagu i dahi mee.*

⁷ Idi ala lahua, goodou nia daane hai lodo, goodou giinoho ibaahi godou lodo, giiloo bolo godou lodo le epaagege. Gei goodou gi hagabalagauina digaula, idimaa, digaula ga haimme labelaa gidi mouli kisakis ibaahi o God, gadoo be goodou. Idi godou hai di mee deenei, hudee haga deaadee ina digodou hai dalodalalo.

Hagaduadua i di haihai nia mee donu

⁸ Malaa, goodou giibuni godou hagamaanadu mo godou hiihai. Goodou hagdau aaloho i godou mehanga, dumaalia, ge hila gilala. ⁹ Goodou hudee huia di huaidu gi di huaidu, be nnelekai huaidu gi nnelekai huaidu, gei gi huia anga nnelekai huaidu gi nnelekai humalia, idimaa, ma go di humalia dela ne hagababa adu go God i dana gahigahi goodou. ¹⁰ Idimaa, di Beebaa Dabu e helekai, “Tangada dela ehiihai ehaga tenetene dono mouli,

* **3.6:** Genesis 18.12

e hiihai e mmada gi di madagoaa humalia,
geia gii lawa gi daha mo ana helehelekai huaidu
mo ana helehelekai tilikai.*

¹¹ Mee e hai loo gii huli gi daha mo nia mee huaidu
gi heia nia mee humalia,
gi halahala ina di noho i di aumaalia,
mai i lodo dono manawa hagatau.

¹² Idimaa, Dimaadua e benebene hua digau ala
e donu,
gei e hagalongo gi nadau dangidangi,
gei Mee e huli gi daha mo digau ala e haihai nia
mee huaidu.”

¹³ Ma koai dela e mee di hagahuaidu goodou ala
maga hagamahi huoloo e hai nia mee humalia?

¹⁴ Maa goodou gaa hai digau e hagaduadua
i godou haihai humalia, e maluagina go
goodou! Goodou hudee mmaadagu inia
daangada, ge hudee hagabaubau e logo.* ¹⁵ Gei
goodou gi hagalaamua ina a Christ ilodo godou
manawa, duguina a Mee e hai di godou Dagi.
Hagatogomaalia inia madagoaa huogodoo,
giimeei digodou helekai gi tangada dela
ga hee adu bolo gi hagamodongoohia ina di
hagadagadagagee dela i godou baahi. ¹⁶ Gei
gi heia dimaa idi manawa hilagilala modi
hagalaamua, ilodo godou manawa madammaa,
idimaa, digau ala e dili nadau kai tilikai i di godou
haihai nia mee humalia i baahi o Christ, digaula
gaa tee, ge ga langaadia i nadau kai tilikai ne hai.
¹⁷ Maa deenei di hiihai a God, e koia e humalia
bolo gi duadua di hai nia mee humalia i di hai

* **3.10:** Pisalem 34.12-16 * **3.14:** Matthew 5.10; Isaiah 8.12-13

nia mee huaidu. ¹⁸ Idimaa, Christ ne made hua haga dahi gi nia huaidu digau huogodoo. Tangada hai mee donu, epono digau hai mee hala, belee laha mai goodou gi God. Mee ne made i tuaidina, ga mouli aga i di hagataalunga. ¹⁹ Gei Mee gaa hana i di hagataalunga, ga agoago ginia hagataalunga ala nogo lawalawa. ²⁰ Malaa nia hagataalunga aanei, lago nia hagataalunga o digau de hagalongo gi God i di madagoaa God nogo tali maalia digaula, i di madagoaa Noah nogo hau dana waga. Digau nogo i lodo di waga, la dogowalu huogodoo ala ne mouli i toloo deela.* ²¹ Toloo deela la di haga modongoohia odi babdais, dela e haga mouli goodou dolomeenei. Nia wai aanei la hagalee go di haga madammaa nia dogolia i tadau gili, gei di hagababa ne hai anggi God mai i di manawa madammaa. Di babdais e haga mouli goodou mai i di mouli aga o Jesus Christ, ²² dela guu hana gi di langi, guu noho i baahi gaudonu o God, edagi nia daangada di langi, nia dagi, mo digau mogobuna o di langi huogodoo.

4

Nia mouli ala ne huli

¹ Malaa, idimaa Christ la gu hagaduadua dono huaidina, gei goodou gimaaloo labelaa bedi hagamamaanadu dela ne hai go Mee, idimaa, tangada dela ga hagaduadua dono huaidina, ia ne huli gidaha mo nia huaidu. ² Dolomeenei gaa hana gi muli i di waalooloo o godou mouli,

* **3.20:** Genesis 6.1—7.24

goodou gi daudalia hua di manawa o God, hagalee go nia hiihai dangada. ³ Idimaa, di waalooloo o godou mouli maiimua, goodou nogu hai nia mee digau ala enoho ilodo di bouli ala e hiihai e hai. Goodou guu hai nia hagadilinga mee huaidu huogodoo hagalangaadia dangada, hai bedi manu, gai tagaao, hai hoo huaidu, hagalongoaa, inu gi libaliba, mo nia hai daumaha anggi nia balugod. ⁴ Malaa, dolomeenei gei digau o lodo di bouli guhomouli idi godou dee bunianga gi ginaadou e hai nia hagadilinga mee huaidu aanei. Gei digaula ga helehelekai huaidu i goodou. ⁵ Malaa, digaula e hai gi hagi aga ginaadou gi God, di God dela e hagi aga digau mouli mo digau mmade. ⁶ Malaa, deenei tadinga di Longo Humalia dela ne hagadele labelaa anggi digau ala guu mmade dolomeenei, anggi ginaadou ala guu kae di hagi aga baahi gi tuaidina, bedi hai o digau huogodoo ala e hagi aga. Di Longo Humalia ne hagadele anggi digaula bolo ilodo nadau mouli hagataalunga, digaula e mouli be di mouli a God dela e mouli ai.

Digau madamada humalia nia wanga dehuia a God

⁷ Di hagaodi o nia mee huogodoo la gu hoohoo mai. Goodou gi madamada humalia i godou huaidina, gei gikanakana, giimee ai goodou di haidalodalo. ⁸ Imua nia mee huogodoo, gei goodou hagamaha gi hagadau aaloho, idimaa, di aloho le e daabui nia hagadilinga huaidu huogodoo.* ⁹ Hugee

* **4.8:** Agoago Podo 10.12

godou hale gi tangadanei mo tangadanei, hudee helekai elogo. ¹⁰ Tangadanei mo tangadanei lagiihai be tangada madamada humalia nia hagadilinga wanga dehuia a God, gei gi haga hai hegauina nia wanga dehuia ala nekae koia ibaahi o God, e hagahumalia digau ala igolo. ¹¹ Digau ala e agoago, gi agoago inia helekai a God. Digau ala e hai hegau, gi hai hegau ginia mahi ala newanga go God gi ginaadou, gi hagaamuina a God inia mee huogodoo mai i Jesus Christ dela e hai mee ginia madamada mo nia mahi, dolomeenei gaa hana hua beelaa. Amen.

Hagaduadua be nia dama a Christ

¹² Ogu ihoo hagaaloho, goodou hudee homouli gi nia hagadilinga haga mmaemmae ala e tale adu gi goodou ala e hagamada goodou, be nia hai hagagoboina ala e haiadu gi goodou. ¹³ Gei goodou giitene gi digodou hai mee gidi hagaduadua o Christ, gi mee goodou di honu i di tene idi madagoaa ono madamada magakila aga. ¹⁴ E maluagina go goodou, maa goodou ga hagahuidu, idimaa goodou ala edaudali a Christ. Di mee deenei e haga modongoohia bolo di Hagataalunga madamada, di Hagataalunga o God, la gui godou baahi. ¹⁵ Maa tangada i goodou ga hagaduadua, hagalee ne hagaduadua bolo mee tangada daaligi dangada, tangada gaiaa, tangada de hagalongo, be tangada e hagahuidu nia moomee digau ala igolo. ¹⁶ Maa goodou ga hagaduadua idimaa goodou nia dama ni Christ, goodou hudee langaadia, gei goodou gi danggee

hagaamuina a God idi godou hagaingoo gi di ingoo o Christ.

¹⁷ Di madagoaa di hagiaga gaadae mai, edaamada inia dama a God imua. Maa di hagiaga deenei gadaamada i gidaadou, malaa, ga hagalawa behee ibaahi digau ala hagalee hagadonu di Longo Humalia dela mai baahi o God? ¹⁸ Di Beebaa Dabu e helekai, “Ma e haingadaa huoloo anggi digau humalia e hagamouli, malaa dehee di hai anggi digau huaidu de hagadonu?”*

¹⁹ Malaa, digau ala e hagaduadua idimaa deenei di manawa o God anggi digaula, lagi heheia nadau haihai humalia mo di hagadagadagee mo nadau mouli hagatau anggi di God manawa dahi dela ne hai digaula.

5

Di hagabuulinga siibi a God

¹ Au ehagamahiadu gi goodou inia mee aanei, goodou go digau mmaadua daumaha. Gei au tangada madua daumaha labelaa, guu hai tangada ehagamodongoohia di hagaduadua o Christ, gei au emadalia labelaa e hai mee gi di madamada dela gagilaaga. Malaa, au ehagamahiadu gi goodou, ² bolo goodou gi ngalua be digau hagaloohi siibi o di hagabuulinga siibi dela neduguadu go God, gibenebeneina mai godou hiihai manawa be di hiihai a God gei hagalee mai godou de hiihai.* ³ Goodou hudee

* **4.18:** Agoago Podo 11.31

* **5.2:** John 21.15-17

heia goodou giidagi digau ala e benebene, gei goodou heia nia mee ekawe go digaula. ⁴ Idi madagoaa Tangada Hagaloohisiibi Aamua ga hanimoi, goodou gaakae di hau madamada dela hagalee ngudu dono dingidingia.

⁵ Gei goodou ala go nia dama daane, goodou gi dugu anga goodou gi digau mmaadua. Goodou gi hila gilala, gi hagadau maamaa i godou mehanga. Idimaa, di Beebaa Dabu e helekai, “God e hai baahi gi nia daangada ala e hagamuamua, ge ewanga dono dumaalia gi digau ala e hila gilala.”*

⁶ Malaa, goodou gi hila gilala, ilala nia mogobuna o God, go Mee dela ga haga menege aga goodou i dono madagoaa humalia.* ⁷ Dugu ina godou manawa gee huogodoo gi Mee, idimaa, Mee e madamada humalia i goodou.

⁸ Goodou gi hagatogomaalia ge gikanakana, idimaa, di godou hagadaumee go Setan, e heehee ge e wolowolo gadoo be di laion, e halahala dana dangada e gai. ⁹ Goodou gi hai baahi gi di godou hagadaumee, gei gi mau dangihi idi godou hagadonu, idimaa, goodou guiloo bolo godou duaahina daumaha ala enoho inia madagowaa huogodoo i henuailala, e hai be goodou ilodo di hagaduadua dela e tale ginai goodou. ¹⁰ I muli di hagaduadua bodobodo nei, God honu tumaalia dela ne haga gahi mai goodou gi hai mee gi dono madamada dee odi i di godou hagadaubuni ang gi

* **5.5:** Agoago Podo 3.34
18.14

* **5.6:** Matthew 23.12; Luke 14.11;

Christ, ga haga manawa lamalia, hagamaaloo aga, ge haga mau dangihi goodou. ¹¹ Nia mogobuna gi madalia a Mee gaa hana hua beelaa. Amen!

Nia hagaaloho haga muliagina

¹² Au e hihi di lede bodobodo deenei mai i di hagamaamaa o Silas, e dugu ko au bolo tuaahina manawa dahi. Au e hagamaaloo aga godou manawa, ge e haga modongoohia adu gi goodou bolo deenei go tumaalia donu o God. Goodou gii tuu maaloo i tumaalia deenei.*

¹³ Godou duaahina nohongo dabu i Babylon gu hilihili aga gadoo be goodou mai di manawa o God, digaula mo dagu dama daane go Mark, e hagau adu di nadau hagaaloho.* ¹⁴ Goodou gi hagamaaloo i godou mehanga i di aloho dama a Christ.

Di aumaalia gi madalia goodou huogodoo ala e buni anga gi Christ.

* **5.12:** Nnegau 15.22,40

* **5.13:** Nnegau 12.12,25; 13.13; 15.37-39; Colossians 4.10; Philemon 24

Beebaa Dabu
The Holy Bible in the Kapingamarangi language of the
Federated States of Micronesia, spoken on the
Kapingamarangi and Ponape islands, Caroline Islands

Copyright © 1996, 2014 The Kapingamarangi Bible translation committee

Language: Kapingamarangi

Translation by: The Kapingamarangi Bible translation committee

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-04-24

PDF generated using Haiola and XeLaTeX on 11 Nov 2022 from source files dated 7 Jun 2022

28201f3a-53b9-559a-9b49-00a6f40bcb2a